

八  
代  
詩  
選

八代詩選目錄

卷一

四言一 漢至晉

卷二

四言二 晉至隋

卷三

五言一 漢

卷四

五言二 魏

卷五

五言三 晉第一

卷六

五言四 晉第二

卷七

五言五 晉第三

卷八

五言六 宋第一

卷九

五言七 宋第二

卷十

五言八 齊

卷十一上

五言九 梁

卷十一下

五言九 陳隋

卷十二

齊已後新體詩一 齊全梁上

卷十三

齊已後新體詩二 梁下陳全

卷十四

齊已後新體詩三 北朝全隋全

卷十五

雜言一 漢至晉

卷十六

雜言二 宋至梁

卷十七

雜言三 陳至隋

卷十八

郊廟樂章及頌德樂詞 漢至隋

卷十九

歌謠全卷 漢至隋

卷二十

雜體全卷 漢至隋

八代詩選目錄

八代詩選目錄

漢至晉一

八代詩選一

四言第一

長沙湘潭王闔運撰

韋孟

諷諫詩

肅肅我祖國自豕韋黼衣朱紱四牡龍旂彤弓斯征撫甯  
遐荒總齊羣邦以翼大商迭彼大彭勳績惟光至於有周  
歷世會同王赧聽譖實絕我邦我邦既絕厥政斯逸賞罰  
之行非繇王室庶尹羣后靡扶靡衛五服崩離宗周以墜  
我祖斯微遷於彭城在子小子勤唉厥生阨此媢秦耒耜  
斯耕悠悠媢秦上天不甯乃眷南顧授漢於京於赫有漢

四方是征靡適不懷萬國攸平乃命厥弟建侯於楚俾我  
小臣惟傅是輔矜矜元王恭儉靜一惠此黎民納彼輔弼  
享國漸世垂烈於後迺及夷王克奉厥緒咨命不永惟王  
統祀左右陪臣斯惟皇士如何我王不思守保不惟履冰  
以繼祖考邦事是廢逸游是娛犬馬悠悠是放是驅務此  
鳥獸忽此稼苗烝民以匱我王以媮所弘匪德所親匪俊  
惟囿是恢惟諛是信踰踰諛夫諤諤黃髮如何我王曾不  
是察既藐下臣追欲縱逸慢彼顯祖輕此削黜嗟嗟我王  
漢之睦親曾不夙夜以休令聞穆穆天子照臨下土明明  
羣司執憲靡顧正遐由近殆其怙茲嗟嗟我王曷不斯思



匪思匪監嗣其罔則彌彌其逸岌岌其國致冰匪霜致墜  
匪媢瞻惟我王時靡不練興國救顛孰違悔過追思黃髮  
秦穆以霸歲月其徂年其逮考於赫君子庶顯於後我王  
如何曾不斯覽黃髮不近胡不時鑒

在鄒詩

微微小子既考且陋豈不幸位穢我王朝王朝肅肅惟俊  
之廷顧瞻余躬懼穢此征我之退征請於天子天子我恤  
矜我髮齒赫赫天子明哲且仁懸車之義以泊小臣嗟我  
小子豈不懷土庶我王寤越遷於魯旣去禰祖惟懷惟顧  
祁祁我徒戴負盈路爰戾於鄒鬻茅作堂我徒我環築室

於牆我既遷逝心存我舊夢我瀆上立於王朝其夢如何  
夢爭王室其爭如何夢王我弼寤其外邦歎其喟然念我  
祖考泣涕其漣微微老夫咨既遷絕洋洋仲尼視我遺烈  
濟濟鄒魯禮義惟恭誦習絃歌異於他邦我雖鄙耇心其  
好而我徒侃爾樂亦在而

東方朔

誠子詩

明者處世莫尚於中優哉游哉於道相從首陽爲拙柳惠  
爲工飽食安步以仕代農依隱玩世詭時不逢才盡身危  
好名得華有羣累生孤貴失和遺餘不匱自盡無多聖人

之道一龍一蛇形見神藏與物變化隨時之宜無有常家

王昭君

怨詩

秋木萋萋其葉萎黃有鳥處山集於苞桑養育毛羽形容  
生光旣得升雲上游曲房離宮絕曠身體摧藏志念抑沈  
不得頡頏雖得委食心有徊徨我獨伊何來往變常翩翩  
之燕遠集西羌高山峩峩河水泱泱父兮母兮道里悠長  
嗚呼哀哉憂心惻傷

張衡

怨篇

猗猗秋蘭植彼中阿有馥其芳有黃其葩雖曰幽深厥美  
彌嘉之子之遠我勞如何

朱穆

與劉伯宗絕交詩

北山有鷗不潔其翼飛不正向寢不定息饑則木欖飽則  
泥伏饕餮貪汚臭腐是食填腸滿臆嗜欲無極長鳴呼鳳  
謂鳳無德鳳之所趨與子異域永從此訣各自努力

仲長統

述志詩

飛鳥遺跡蟬蛻亡殼騰蛇棄鱗神龍喪角至人能變達士

拔俗乘雲無轡騁風無足垂露成幃張霄成幄沆瀣當餐  
九陽代燭恆星豔珠朝霞潤玉六合之內恣心所欲人事  
可遺何爲局促大道雖夷見幾者寡任意無非適物無可  
古來繚繞委曲如瑣百慮何爲至要在我寄愁天上埋憂  
地下叛散五經滅棄風雅百家雜碎請用從火抗志山西  
游心海左元氣爲舟微風爲柁翱翔太清縱意容冶

秦嘉

贈婦

曖曖白日引曜西傾啾啾雞雀羣飛赴楹皎皎明月煌煌  
列星嚴霜悽愴飛雪覆庭寂寂獨居寥寥空室飄飄桂帳

熒熒華燭爾不是居帷帳何施爾不是照華燭何爲

無名人

善哉行

來日大難口燥唇乾今日相樂皆當喜歡經歷名山芝草  
翩翩仙人王喬奉藥一丸自惜袖短內手知寒慚無靈轍  
以報趙宣月沒參橫北斗闌干親交在門饑不及餐歡日  
尙少戚日苦多以何忘憂彈箏酒歌淮南八公要道不煩  
參駕六龍游戲雲端

曹操

短歌行

對酒當歌人生幾何譬如朝露去日苦多慨當以慷憂思  
難忘何以解憂惟有杜康青青子衿悠悠我心但爲君故  
沈吟至今呦呦鹿鳴食野之苹我有嘉賓鼓瑟吹笙明明  
如月何時可掇憂從中來不可斷絕越陌度阡枉用相存  
契闊談讌心念舊恩月明星稀烏鵲南飛繞樹三匝何枝  
可依山不厭高海不厭深周公吐哺天下歸心

步出東西門行

雲行雨步超越九江之皋臨觀異同心意懷游豫不知  
當復何從經過至我碣石心惆悵我東海

東臨碣石以觀滄海水何澹澹山島竦峙樹木叢生百草

豐茂秋風蕭瑟洪波湧起日月之行若出其中星漢燦爛  
若出其裏幸甚至哉歌以詠志 觀滄海

孟冬十月北風徘徊天氣肅清繁霜霏霏鷓鴣雞晨鳴鴻雁  
南飛鷺鳥潛藏熊羆窟栖錢鏹停置農收積場逆旅整設  
以通賈商幸甚至哉歌以詠志 冬十月

鄉土不同河朔隆寒流澌浮漂舟船行難雖不入地蘆籟  
深奧水竭不流冰堅可蹈士隱者貧勇俠輕非心常歎怨  
戚戚多悲幸甚至哉歌以詠志 土不同

神龜雖壽猶有竟時螭蛇乘霧終爲土灰老驥伏櫪志壯  
千里烈士暮年壯心不已盈縮之期不但在天養怡之福



可得永年幸甚至哉歌以詠志 龜雖壽

王粲

贈蔡子篤詩

翼翼飛鸞載飛載東我友云徂言戾舊邦舫舟翩翩以泝  
大江蔚矣荒塗時行靡通慨我懷慕君子所同悠悠世路  
亂離多阻濟岱江行邈焉異處風流雲散一別如雨人生  
實難願其弗與瞻望遐路允企伊仨烈烈冬日肅肅淒風  
潛鱗在淵歸雁在軒苟非鴻鵬孰能飛翻雖則追慕子思  
罔宣瞻望東路慘愴增歎率彼江流爰逝靡期君子信誓  
不遷於時及子同寮生死固之何以贈行言授斯詩中心

孔悼涕淚漣洏嗟爾君子如何勿思

贈士孫文始

天降喪亂靡國不夷我暨我友自彼京師宗守盪失越用  
遁違遷於荆楚在漳之湄在漳之湄亦克宴處和通箴填  
比德車輔旣度禮義卒獲笑語庶茲永日無讐厥緒雖曰  
無讐時不我已同心離事乃有逝止橫此大江淹彼南汜  
我思弗及載坐載起惟彼南汜君子居之悠悠我心薄言  
慕之人亦有言靡日不思矧伊嫵婉胡不懷而晨風夕逝  
託與之期瞻仰王室慨其永歎良人在外誰佐天官四國  
方阻俾爾歸藩爾之歸藩作式下國無曰蠻裔不虔汝德

慎爾所主率由嘉則龍雖勿用志亦靡忒悠悠澹澹鬱彼  
唐林雖則同域邈其迥深白駒遠志古人所箴允矣君子  
不遐厥心既往既來無密爾音

贈文叔良

翩翩者鴻率彼江濱君子於征爰聘西鄰臨此洪渚伊思  
梁岷爾行孔邈如何勿勤君子敬始慎爾所主謀言必賢  
錯說申輔延陵有作僑胥是與先民遺跡來世之矩既慎  
爾主亦迪知幾探情以華覩著知微視明聽聰靡事不惟  
董褐荷名胡甯不師眾不可蓋無尙我言梧宮致辯齊楚  
構患成功有要在眾思歡人之多忌掩之實難瞻彼黑水

滔滔其流江漢有卷允來厥休二邦若否職汝之由緬彼  
行人鮮克弗留尙哉君子異於他仇人誰不勤無厚我憂  
惟詩作贈敢詠在舟

應場

報趙淑麗

朝雲不歸夕結成陰離羣獨宿永思長吟有鳥孤棲哀鳴  
北林嗟我懷矣感物傷心

魏文帝曹丕

短歌行

仰瞻帷幕俯察几筵其物如故其人不存神靈倏忽棄我

遐邇靡瞻靡恃泣涕連連呦呦游鹿銜草鳴麕翩翩飛鳥  
挾子巢棲我獨孤煢懷此百離憂心孔疚莫我能知人亦  
有言憂令人老嗟我白髮生一何早長吟永歎懷我聖考  
曰仁者壽胡不是保

秋胡行二首

堯任舜禹當復何爲百獸率舞鳳凰來儀得人則安失人  
則危惟賢知賢人不易知歌以詠言誠不易移鳴條之役  
萬舉必全明德通靈降福自天

汎汎綠池中有浮萍寄身流波隨風靡傾芙蓉含芳菡萏  
垂榮朝采其實夕佩其英采之遺誰所思在庭雙魚比目

鴛鴦交頸有美一人婉如清揚知音識曲善爲樂方

善哉行二首

上山採薇薄暮苦饑谿谷多風霜露沾衣野雉羣雌猿猴  
相追還望故鄉鬱何壘壘高山有崖林木有枝憂來無方  
人莫之知人生如寄多憂何爲今我不樂歲月如馳湯湯  
川流中有行舟隨波轉薄有似客游策我良馬被我輕裘  
載馳載驅聊以忘憂

有美一人婉如清揚妍姿巧笑和媚心腸知音識曲善爲  
樂方哀絃微妙清氣含芳流鄭激楚度宮中商感心動耳  
綺麗難忘離鳥夕宿在彼中洲延頸鼓翼悲鳴相求眷然

願之使我心愁嗟爾昔人何以忘憂

煌煌京洛行

天天園桃無子空長虛美難假偏輪不行淮陰五刑烏盡  
弓藏保身全名獨有子房大憤不收褻衣無帶多言寡誠  
祇令事敗蘇秦之說六國以亡傾側賣主車裂固當賢矣  
陳軫忠而有謀楚懷不從禍卒不救禍夫吳起智小謀大  
西河何健伏尸何劣嗟彼郭生古之雅人智矣燕昭可謂  
得臣峩峩仲連齊之高士北辭千金東蹈滄海

黎陽作

朝發鄴城夕宿韓陵霖雨載塗輿人困窮載馳載驅沐雨

櫛風舍我高殿何爲泥中牡昔周武爰暨公旦載主南征  
救民塗炭彼此一時惟天所讚我獨何人能不靖亂

殷殷其雷濛濛其雨我徒我車涉此艱阻遵彼洄湄言刈  
其楚班之中路塗潦是御麟麟大車載低載昂嗷嗷僕夫  
載仆載僵蒙塗冒雨沾衣濡裳

陳思王植

上賁躬詩

於穆顯考時惟武皇受命於天甯濟四方朱旗所拂九土  
披攘玄化滂流荒服來王超商越周與唐比蹤篤生我皇  
奕世載聰武則肅烈文則時雍受禪於漢君臨萬邦萬邦



既化率由舊則廣命懿親以藩王國帝曰爾侯君茲青土  
奄有海濱方周於魯車服有輝旗章有敘濟濟篤乂我弼  
我輔伊予小子恃寵驕盈舉挂時綱動亂國經作藩作屏  
先軌是隳傲我皇使我朝儀國有典刑我削我紕將寘  
於理元凶是率明明天子時惟篤類不忍我刑暴之朝肆  
違彼執憲哀予小臣改封充邑於河之濱股肱弗置有君  
無臣荒淫之闕誰弼予身熒熒僕夫於彼冀方嗟予小子  
乃罹斯殃赫赫天子恩不遺物冠我玄冕要我朱紱光光  
大使我榮我華剖符授玉王爵是加仰齒金璽俯執聖策  
皇恩過隆祇承忱惕咨我小子頑凶是嬰逝慙陵墓存愧

闕庭匪敢傲德惟恩是恃威靈改加足以沒齒昊天罔極  
生命不圖常懼顛沛抱罪黃墟願蒙矢石建旗東嶽庶立  
毫釐微功自贖危軀授命知足免戾甘赴江湘奮戈吳越  
天啟其衷得會京畿遲奉聖顏如渴如饑心之云慕愴矣  
其悲天高聽卑皇肯照微

應詔詩

肅承明詔應會皇都星陳夙駕秣馬脂車命彼掌徒肅我  
征旅朝發鸞臺夕宿蘭渚茫茫原隰祁祁士女經彼公田  
樂我稷黍爰有樛木重陰匪息雖有餽糧饑不遑食望城  
不過面邑不游僕夫警策平路是由玄駟藹藹揚鏹漂沫

流風翼衡輕雲承蓋涉澗之濱綠山之隈遵彼河許黃坂  
是階西躋關谷或降或升駢驂倦路載寢載興將朝聖皇  
匪敢宴甯弭節長驚指日遄征前驅舉燧後乘抗旌輪不  
輟運鑿無廢聲爰暨帝室稅此西墉嘉詔未賜朝覲莫從  
仰瞻城闕俯惟闕庭長懷永慕憂心如醒

朔風詩

仰彼朔風用懷魏都願騁代馬倏忽北徂凱風永至思彼  
蠻方願隨越鳥飈飛南翔四氣代謝懸景運周別如俯仰  
脫若三秋昔我初遷朱華未晞今我旋止素雪云飛俯降  
千仞仰登天阻風飄蓬飛載離寒暑千仞易陟天阻可越

昔我同袍今永乖別子好芳草豈忘爾貽繁華將茂秋霜  
悴之君不垂眷豈云其誠秋蘭可喻桂樹冬榮絃歌蕩思  
誰與銷憂臨川慕思何爲泛舟豈無和樂游非我鄰誰忘  
沉舟愧無榜人

矯志詩

芝桂雖芳難以餌烹尸位素餐難以成名磁石引鐵於金  
不連大朝舉士愚不聞焉抱璧塗乞無爲貴寶履仁避禍  
無爲貴道鴛鴦遠害不羞卑棲靈虬避難不恥污泥都蔗  
雖甘杖之必折巧言雖美用之必滅濟濟唐朝萬邦作孚  
逢蒙雖巧必得良弓聖主雖知必得英雄螳螂見歎齊士

輕戰越王軾蛙國以死獻道遠知驥世僞知賢覆之憐之  
順天之矩澤如凱風惠如時雨口爲禁闔舌爲發機門機  
之闔楛矢不追

稽康

幽憤詩

嗟余薄祜少遭不造哀榮靡識越在纏緲母兄鞠育有慈  
無威恃愛肆姐不訓不師爰及冠帶憑寵自放抗心希古  
任其所尚託好老莊賤物貴身志在守樸養素全真曰余  
不敏好善闇人子玉之敗屢增惟塵大人含弘藏垢懷恥  
民之多僻政不由己惟此褊心顯明臧否感悟思愆怛若

創瘡欲寡其過謗議沸騰性不傷物頻致怨憎昔慙柳惠  
今愧孫登內負宿心外慙良朋仰慕嚴鄭樂道閒居與世  
無營神氣晏如咨予不淑嬰累多虞匪降自天實由頑疏  
理弊患結卒致囹圄對答鄙訊繫此幽阻實恥訟寃時不  
我與雖曰義直神辱志沮澡身滄浪豈云能補嗷嗷鳴雁  
奮翼北游順時而動得意忘憂嗟我憤歎曾莫能儔事與  
願違邁茲淹留窮達有命亦又何求古人有言善莫近名  
奉時恭默咎悔不生萬石周慎安親保榮世務紛紜祗攪  
予情安樂必誠乃終利貞煌煌靈芝一年三秀予獨何爲  
有志不就懲難思復心焉內疚庶勸將來無馨無臭采薇

山阿散髮巖岫永嘯長吟頤性養壽

贈秀才入軍

穆穆惠風扇彼輕塵  
弈素波轉此游鱗  
伊我之勞有懷  
佳人寤言永思實鍾所親

所親安在舍我遠邁  
棄此蓀芷襲彼蕭艾  
雖曰幽深豈無  
顛沛言念君子不遐有害

良馬既閒麗服有暉  
左攬繁弱右接忘歸  
風馳電逝躡景  
追飛凌厲中原顧盼生姿

輕車迅邁息彼長林  
春木載榮布葉垂陰  
習習谷風吹我  
素琴交交黃鳥顧儔  
弄音感悟馳情思我  
所欽心之憂矣

永嘯長吟

浩浩洪流帶我邦  
畿萋萋綠林奮榮揚  
暉魚龍瀨澗山鳥  
羣飛駕言出游日  
夕忘歸思我良朋  
如渴如饑願言不獲  
愴矣其悲

息徒蘭圃秣馬華山  
流磻平皋垂綸長川  
目送歸鴻手揮五絃  
俯仰自得游心太玄  
嘉彼釣叟得魚忘筌  
郢人逝矣誰與盡言

閒夜肅清朗月照軒  
微風動袿組帳高褰  
旨酒盈樽莫與交歡  
鳴琴在御誰與鼓彈  
仰慕同趣其馨若蘭  
佳人不存能不永歎



琴詩自樂遠游可珍含道獨往棄智遺身寂乎無累何求  
於人長寄靈嶽怡志養神

流俗難悟逐物不還至人遠鑒歸之自然萬物爲一四海  
同宅與彼其之予何所惜生若浮寄暫見忽終世故紛紜  
棄之入戎澤雉雖饑不願園林安能服御勞形苦心身貴  
名賤榮辱何在貴得肆志縱心無悔

荀勗

從武帝華林園宴

習習春陽帝出乎震天施地生以應仲春思文聖皇順時  
秉仁欽若靈則飲御嘉賓洪恩普暢慶乃眾臣其慶惟何

八代詩選 卷一 謝靈運詩一  
錫以帝祉肆觀羣后有客戾止外納要荒內延卿士簫管  
詠德八音咸理凱樂飲酒莫不宴喜

張華

勵志詩

大儀幹運天迴地游四氣鱗次寒暑環周星火既夕忽焉  
素秋涼風振落熠燿宵流吉士思秋實感物化日與月與  
荏苒代謝逝者如斯曾無日夜嗟爾庶士胡甯自舍仁道  
不遐德輪如羽求焉斯至眾鮮克舉大猷玄漠將抽厥緒  
先民有作貽我高矩雖有淑姿放心縱逸出般於游居多  
暇日如彼梓材弗勤丹漆雖勞樸斲終負素質養由矯矢

獸號於林蒲蘆縈繳神感飛禽末伎之妙動物應心研精  
馳道安有幽深安心恬蕩棲志浮雲體之以質彪之以文  
如彼南畝力耒旣勤蔗蓂致功必有豐殷水積成川載瀾  
載清土積成山歛蒸鬱冥山不讓塵川不辭盈勉爾含弘  
以隆德聲高以下基洪由織起川廣自源成人在始累微  
以著乃物之理纏牽之長實累千里復禮終朝天下歸仁  
若金受礪若泥在鈞進德修業輝光日新隰朋仰慕予亦  
何人

太康六年三月三日後園會

暮春元日陽氣清明祁祁甘雨膏澤流盈習習祥風啟滯

導生禽鳥翔逸卉木滋榮纖條被綠翠華含英於皇我后  
欽若昊乾順時省物言觀中園讌及羣辟乃命乃延合樂  
華池祓濯清川汎彼龍舟泝游洪源朱幕雲覆列坐文茵  
羽觴波騰品物備珍管絃繁會變用奏新穆穆我皇臨下  
渥仁訓以慈惠詢納廣神好樂無荒化達無垠咨予微臣  
荷寵明時忝恩於外攸攸三期犬馬惟慕天寶爲之靈啟  
其願邀願在茲於以表情爰著斯詩

傅玄

短歌行

長安高城層樓亭亭千雲四起上貫天庭蜉蝣何整行如

軍征蟋蟀何感中夜哀鳴虬蜉愉樂粲粲其榮寤寐念之  
誰知我情昔君視我如掌中珠何意一朝棄我溝渠昔君  
與我如影如形何意一去心如流星昔君與我兩心相結  
何意今日忽然雨絕

答程曉詩

弈弈兩儀昭昭太陽四氣代升三朝受祥濟濟羣后峩峩  
聖皇元服肇御配天垂光伊州作弼王室惟康颺颺兆民  
蠢蠢戎羶率土充庭萬國奉蕃皇澤雲行神化風宣六合  
咸熙遐邇同歡赫赫明明天人合和下罔遺滯焦朽斯華  
矧我良朋如玉之嘉穆穆雝雝興頌作歌

傅咸

與尚書同僚詩

非望之寵謬加於已猥授非據奄司萬里煌煌朱軒服驥  
 駟駟睦睦初星肅肅臣僕暉光顯赫眾目所屬斯之弗稱  
 匪榮伊辱質弱尚父受任鷹揚德非樊仲王命是將百城  
 或違無能有匡一州之矜將弛其綱得意忘言言在意後  
 夫惟神交可以長久我心之孚有盈於缶與子偕老豈曰  
 執手出司萬里牧彼朔濱服冕乘軒六轡旣均威風先邁  
 百城肅震

應貞

華林園集詩

悠悠太上民之厥初皇極肇建彝倫攸敷五德更運膺籙  
受符陶唐既謝天厯在虞於時上帝乃顧惟眷光我晉祚  
應期納禪位以龍飛文以虎變玄澤滂流仁風潛扇區內  
宅心方隅回面天垂其象地耀其文鳳鳴朝陽龍翔景雲  
嘉禾重穎萁莢載芬率土咸序人胥悅欣恢恢皇度穆穆  
聖容言思其順貌思其恭在視斯明在聽斯聰登庸以德  
明試以功其恭惟何昧且不顯無理不經無義不踐行捨  
其華言去其辭游心至虛同規易簡六府孔修九有斯靖  
澤靡不被化罔不加聲教南暨西漸流沙幽人肆險遠國

忘遐越裳重譯充我皇家  
戎戎列辟赫赫虎臣內和五品  
外威四賓修時貢職入覲  
天人備言錫命羽蓋朱輪  
貽宴好會不常厥數神心  
所受不言而喻於時肄射  
弓矢斯御發彼五的有酒  
斯飫文武之道厥猷未墜  
在昔先王射御茲器示武  
懼荒過亦爲失凡厥羣后  
無懈於位

束皙

補亡詩六首

序曰皙與同業疇人肆修鄉飲之禮然所詠之詩或有義無辭音樂取節闕而不備於是遙想既往存思在昔補著其文以綴舊制



南陔孝子相戒以養也

循彼南陔言采其蘭眷戀庭闈心不遑安彼居之子罔或  
游盤馨爾夕膳絜爾晨餐循彼南陔厥草油油彼居之子  
色思其柔眷戀庭闈心不遑留馨爾夕膳絜爾晨羞有獺  
有獺在河之涘凌波赴汨噬魴捕鯉嗷嗷林鳥受哺於子  
養隆敬薄惟禽之似勗臻爾虔以介丕祉

白華孝子之絜白也

白華朱萼被於幽薄粲粲門子如磨如錯終晨三省匪惰  
其恪白華絳趺在陵之陬蒨蒨士子涅而不渝竭誠盡敬  
亶亶忘劬白華玄足在邱之曲堂堂處子無營無欲鮮佻

晨葩莫之點辱

華黍時和歲豐宜黍稷也

黜黜重雲輯輯和風黍華陵巔麥秀邱中靡田不播九穀  
斯豐奕奕玄霄濛濛甘雷黍發稠華亦挺其秀靡田不殖  
九穀斯茂無高不播無下不殖芒芒其稼參參其穡稽我  
王委充我民食玉燭陽明顯猷翼翼

由庚萬物得由其道也

蕩蕩夷庚物則由之蠢蠢庶類王亦柔之道之既由化之  
既柔木以秋零草以春抽獸在於草魚躍順流四時遞謝  
八風代扇織阿案晷星變其躔五緯不逆六氣無易愒愒

我王紹文之跡

崇邱萬物極其高大也

瞻彼崇邱其林藹藹植物斯高動類斯大周風既洽王猷  
允泰漫漫方輿回回洪覆何類不繁何生不茂物極其性  
人承其壽恢恢大圉茫茫九壤資生仰化於何不養人無  
道天物極則長

由儀萬物之生各得其儀也

肅肅君子由儀率性明明后辟仁以爲政魚游清沼鳥萃  
平林濯鱗鼓翼振振其音賓寫爾誠主竭其心時之和矣  
何思何修文化內輯武功外悠

何劭

洛水祖王公應詔

穆穆聖王體此慈仁友于之至通於明神游宴綢繆情戀  
所親薄云餞之於洛之濱嵩崖巖巖洪流湯湯春風動袵  
歸雁和鳴我后饗客鼓瑟吹笙舉爵惟別聞樂傷情嘉宴  
既終白日西歸羣司告旋鸞輿整綬我皇重離頓轡驂駟  
臨川永歎酸涕霑頤崇恩感物左右同悲

陸機

短歌行

置酒高堂悲歌臨觴人壽幾何逝如朝霜時無重至華不

再揚蘋以春暉蘭以秋芳來日苦短去日苦長今我不樂  
蟋蟀在房樂以會興悲以別章豈曰無感憂爲子忘我酒  
旣旨我肴旣臧短歌有詠長夜無荒

隴西行

我靜如鏡民動如煙事以形兆應以象懸豈曰無才世鮮  
興賢

皇太子宴玄圃宣猷堂有令賦詩一首

三正迭紹洪聖啟運自昔哲王先天而順羣辟崇替降及  
近古黃暉旣渝素靈承祐乃眷斯顧祚之宅土三后始基  
世武丕承協風旁駭天晷仰澄溟曜六合奄齊七政時文

惟晉世篤其聖欽翼昊天對揚成命九區克咸燕歌以詠  
皇上纂隆經教弘道於化既豐在工載考俯釐庶績仰荒  
大造儀刑祖宗妥綏天保篤生我后克明克秀體輝重光  
承規景數茂德淵沖天姿玉裕叢爾小臣邈彼荒遐弛厥  
負擔振纓承華匪願伊始惟命之嘉

答賈謐

余昔爲太子洗馬賈長淵以散騎侍東宮積年余出補  
吳王郎中令元康六年入爲尙書郎魯公贈詩一篇作  
此詩答之云爾

伊昔有皇肇濟黎蒸先天創物景命是膺降及羣后迭毀

迭興邈矣終古崇替有徵在漢之季皇綱幅裂大辰匿暉  
金虎曜質雄臣馳驚義夫赴節釋位揮戈言謀王室王室  
之亂靡邦不泯如彼墜景曾不可振乃眷三哲俾乂斯民  
啟土唯難改物承天爰茲有魏卽宮天邑吳實龍飛劉亦  
岳立干戈載揚俎豆載戢民勞師興國玩凱入天厭霸德  
黃祚告釁獄訟違魏謳歌適晉陳留歸蕃我皇登禪庸岷  
稽顙三江改獻赫矣隆晉奄宅率土對揚天人有秩斯祐  
惟公太宰光翼二祖誕育洪胄纂戎於魯東朝旣建淑問  
寢我我求明德濟同以和魯公戾止袞服委蛇思媚皇儲  
高步承華昔我逮茲時惟下僚及子棲遲同林異條年殊

志比服舛義稠游跨三春情固二秋祗承皇命出納無違  
往踐蕃朝來步紫微升降祕閣我服載暉孰云匪懼仰肅  
明威分索則易攜手實難念昔良游茲焉永歎公之云感  
貽此音翰蔚彼高藻如玉如蘭惟漢有木曾不踰境惟南  
有金萬邦作詠民之胥好狷狂厲聖儀刑在昔予聞子命  
贈馮文罷遷斥邱令

於皇聖世時文惟晉受命自天奄有黎獻閭闔旣關承華  
再建明明在上有集惟彥奕奕馮生哲問允迪天保定子  
靡德不鑠邁心玄曠矯志崇邈遵彼承華其容灼灼嗟我  
人斯戢翼江潭有命集止翻飛自南出自幽谷及爾同林



雙情交映遺物識心人亦有言交道實難有頽者弁千載  
一彈今我與子曠世齊歡利斷金石氣惠秋蘭羣黎未綏  
帝用勤止我求明德肆於百里僉曰爾諧俾民是紀乃眷  
北徂對揚帝祉疇昔之游好合纏繇借曰未給亦旣三年  
居陪華幄出從朱輪方驥齊鑣比跡同塵之子旣命四牡  
項領遵塗遠蹈騰軌高騁慶雲扶質清風承景嗟我懷人  
其邁惟永否泰有殊窮達有違及子春華後爾秋暉逝將  
去我陟彼朔陁非子之念心孰爲悲

贈潘尼

水會於海雲翔於天道之所混孰後孰先及子雖殊同升

太玄舍彼玄冕襲此雲冠遺情市朝永志邱園靜猶幽谷  
動若抽蘭

陸雲

大將軍宴被命作詩

皇皇帝祜誕隆駿命四祖正家天祿保定叡哲惟晉世有  
明聖如彼日月萬景攸正巍巍明聖道隆自天則明分爽  
觀象洞玄陵風協極絕輝照淵肅雍往播福祿來臻在昔  
姦臣稱亂紫微神風潛駭有赫茲威靈旗樹旆如電斯揮  
致天之屆於河之沂有命再集皇輿凱歸頽綱旣振品物  
咸秩神道見素遺華反質辰晷重光協風應律函夏無塵

海外有謚芒芒宇宙天地交泰王在華堂式宴嘉會玄暉  
峻朗翠雲崇靄冕弁振纓服藻垂帶祁祁臣僚有來雍雍  
薄言載考承顏下風俯覲嘉客仰瞻玉容施已唯約於禮  
斯豐天錫難老如嶽之崇

征西大將軍京陵王公會射堂皇太子見命作此詩

芒芒太極玄化烟煴頽形成器凌象垂文大鈞造物庶類  
羣分先識經始實綜彝倫惟岳隆周生甫及申天鑒在晉  
祚之降神邈矣遐風茂德有鄰永言配命惟晉之鎮厥鎮  
伊何實幹心膂文教內輔武功外禦淮方未靖帝曰攸序  
公於出征奄有南浦南海旣賓爰戢干戈桃林釋駕天馬

婆娑象齒南金來格皇家絕音協徽宇宙告和玄綱峻極  
天罔旣絃文武方升允茲兼弘峩峩高夏有肅其涼公侯  
戾止駉驥龍驤善問如林在會鏘鏘祝融御節火正緝熙  
凱風徘徊萬物欣時秩秩初筵薄言在茲嘉福介祐萬壽  
無期

大安二年夏四月大將軍出祖王羊二公於城南堂皇被  
命作此詩

時文惟晉天祚有祥聖宰作弼受言旣臧育赫斯庸勳格  
昊蒼景物臺暉棟隆玉堂惟常思庸大興光迪聖敬遠躋  
神道玄邈思媚三靈誕膺天篤嘉命旣辱王人言告翼

王人言告惟慕公輿駕言乃眷斯顧華旂飛藻鳴鸞振路  
駢駢四牡噓天載步我有高夏如雲斯蒼彫軒戾止薄言  
嘉會問誰在宴惟俊惟又豐俎殷薦獻酬交泰攸攸昊天  
南正興言朱明有暉萬葉翠繁昌雲垂天凱風熙顏王臣  
在此貽宴於懽懸象西頽虞淵納景嘉樂未晞嚴駕已整  
行矣征人身乖路永飛驂顧懷華蟬引領遺思北京結轡  
臺省

贈顧驃騎

有皇美祈陽也祈陽秉文之士駿發其聲故能明照有  
吳入顯乎晉國人美之故作是詩焉

有皇大晉時文憲章規天有光矩地無疆神篤斯祐本顯  
克昌載生之雋實惟祈陽哲問宣猷考茂其相於鑠祈陽  
誕鍾天篤清輝龍見玄猷淵嘿沈機響駭幽神廣覲和以  
同人物歸時育有大惡盈謙以自牧思我懿範萬民來服  
吳未喪師天秩有庸淵哉若人弱冠休風俯翼黃門以德  
來忠端秀蕃后正色儲宮徽音鑠穎邈矣遐蹤皇維南終  
舊邦匪歆委弁釋位如龍之潛考槃窮谷假樂豐林子雖  
藏器鐘鼓有音惠風往敬慶問來尋濟濟元公相惟天子  
明明辟王思隆多士帝曰欽哉有命集止我咨四方令問  
在爾以朕大賚乃膺嘉祉聿來胥步觀國之紀惟皇建極

紆熙清曜我有峻民明德來照大觀在上王假有廟黜允  
顯生金聲玉振之子于升利見大人龍輝絕跡有肅清塵  
清塵既彰朝虛好爵敬子侯度慎徽百辟于聞有命德禮  
不易嗟我懷人瞻言永錫豐祐東法惟子之績遵汶涉泗  
言告同征勁風宵烈湛露朝零雲垂藹下泉冽清泠哀哉  
行人感物傷情從子京邑言觀厥成天保祚德式穀以甯  
贈鄱陽府君張仲膺

神林何有奇華妙實皇朝如何窮文極質斌斌君子升堂  
入室太上有曜子誕其輝知機日難子達其微入輔幃幄  
出御千里滔滔江漢南國之紀謁帝東堂剖符南征天子

命我車服以榮何以潤之德被蒼生何以濟之威振羣城  
卻愚以化崇賢以仁鳳舒其翮龍濯其鱗憬彼荒藪莫敢  
不賓雖云舊邦其命維新卞和南金終始一色顯允君子  
窮達一德弘仁厲道物究其極古賢受爵循牆虔恭今哲  
居貴履盈如冲接新以化愛舊以豐隆此嚶鳴惇彼谷風  
忠至寵加孝至榮集內崇蘭芬外清名邑煒煒棠棣夙增  
其華猗猗桑梓厥耀孔多被繡畫行昔人攸羨階雲飛藻  
孰與同粲人道伊何難合易離會如升峻別如順淇嗟我  
懷人曷云其來貢言執手涕既隕之

答兄平原



伊我世族太極降精昔在上代軒虞篤生厥生伊何流祚  
萬齡南嶽有神乃降厥靈誕鍾祖考徹茲神明運步玉衡  
仰和太清寶御四門旁穆紫庭紫庭既穆威聲爰振厥振  
伊何播化殊鄰清風攸被率土歸仁彤弧所彎萬里無塵  
功昭王府帝庸厥勳黃鉞授征錫命頻繁闕如禮竟肅茲  
三軍光若辰時亮彼公門仍世上司芳流慶純雲和斯產  
爰有二昆誕豐岐嶷夙邁令聞令聞伊何休音允臧先公  
克構乃崇斯堂耀顯上京發跡扶桑戎車出征時惟鷹揚  
鷹揚既昭勳庸克邁天子命我鎮弼于外往作扞城以表  
南裔降災匪蠲景命顛沛惟我賢昆天姿秀生含奇播殊

明德惟馨太陽散氣乃稟厥和山川垂度爰則厥遐厥遐  
爰何惟光惟大惟大伊何如岱如涓恢此廣淵廓彼洪懿  
引道惇德淵哉爲器統我先基弱冠慷慨將弘祖業實崇  
奕世咨予頑蒙蕞爾弱才沈耀玄渚挹庇雲淇陶化靡移  
固陋於茲瞻仰洪範實忝先基繩繩先基重規累榘赫赫  
重光遐風激鷲昔我先公爰造斯猷今我六蔽匪崇直哉  
悠悠大道載邈載遐洋洋淵源如海如河昔我先公斯綱  
斯紀今我末嗣乃傾乃圯世業之類自予小子仰愧靈邱  
銜憂沒齒憂懷惟何顧景惟塵駸駸高蹤眇眇賀辰彌綽  
繼體莫匪哲人今我頑鄙規範靡遵仍世載德荒之予身

莫峻匪岳有峻斯登莫高匪雲有高斯凌矧我成基匪克  
階升玄黃長坂載寐載興豈敢憚行哀此負乘芒芒高山  
自予頽之濟濟德義匪予懷之終銜永負於其愧而昔予  
言曠汎舟東川銜憂告辭揮淚海濱義陽趣駕炎華電征  
自我不見逸哉八齡悠思迴望寤言通靈昔我往矣辰在  
東隅今我於茲日薄桑榆銜艱邁愍困瘁殷憂哀矣我世  
匪蒙靈休開元迄茲震興迭微弱風隱駭海水羣飛王旅  
南征闡耀靈威予昆乃播爰集朔土載離永久其毒太苦  
上帝休命駕言其歸多我邁愍振蕩朔垂羈繫殊俗初願  
用違嚴駕東征肅邁林野夕秣乘馬朝整僕旅矯矯乘馬

載驅載馳漫漫長路或降或階晨風夙零朝不皇饑傾景  
儵墜夕不存罷雖有豐草匪釋奔駟雖有重陰匪遑遐寐  
熒熒僕夫悠悠適征經彼喬木有鳥嚶鳴微物識儕矧伊  
有情樂茲棠棣實歡友生既至既覲滯思曠年曠年殊域  
覲未浹辰恨其永懷憂心孔艱天地永久命也難長生民  
忽霍曷云其常我之旣存靡績靡紀乾坤難並寂焉其已  
生若電激沒若川征存愧松柏逝慚生靈匪吝性命寶悼  
徒生苟克析薪豈憚冥冥瞻企皇極徼福上天冀我友生  
要期永年昔我先公邦國攸興今我家道絲絲莫承昔我  
昆弟如鸞如龍今我友生凋俊墜雄家哲永徂世業長終

華堂傾構廣宅頽墉高門降衡修庭樹蓬感物悲懷愴矣  
其傷惇仁汜愛錫予好音晞光懷寶煥若南金披華玩藻  
睚若翰林詠彼清聲被之瑟琴味此殊響慰之予心弘懿  
忘鄙命之反覆敢投桃李以報寶玉冀憑光蓋編諸末錄

高岡

瞻彼高岡有猗其桐允也君子寶寶南江員規啟俗沈矩  
履方泳此明流清瀾川通陟彼衡林味其回芳馥馥回芳  
綢繆中原祁祁庶類薄采其芬栖遲泌邱容與衡門聲播  
東汜響溢南雲穆穆闔闔南端啟籥庶明以庸帝聽式闕  
有鳳于潛在林栖翮非予之祚孰與好爵幽居玩物顧景

自頤發憤潛惟伋有思子美忘此終然胥來企子與言  
惟用作詩

答孫顯世

邈矣上祖垂休萬葉廣問弘被崇軌峻躡高山克荒大川  
利涉繁藹惟祐風連雲接大人有作二后利見九功敷奏  
七德殷薦鼎寶重芳勞烈再扇奕世弘道天祿來寔道弘  
振古祚未替今如彼在川亦有浮沈大韶旣素響非我音  
豈非荒止塗弗克尋昌風改物豐水易瀾百川總紀四海  
台源在彼焉取聿來莫觀曾是褊心敢忘邱園員暉偏照  
玄澤謬盈發彼承華頓此增城紀景靈雲倦游紫庭匪曰

能知實忝長纓煥矣金虎襲我皇猷孰云匪忝仰愧蒼流  
往蹇來返弭跡一邱變彼東朝言卽爾謀振振孫子洪族  
之紀志擬龍潛德配麟趾引服朗節克明峻軌遵彼中臯  
於穆不已於穆不已大都是階之子於命民應如隕厚德  
時邁協風允諧惠此海湄俾也可懷乃眷邱林樂哉河曲  
解紱披褐投印懷玉遺情春臺託蔭寒木言念伊人溫其  
在谷道俟人行辭以義輯和容過表余未云執惠音弘播  
清風駿集懷德形憮臨篇景立

失題

悠悠縣象昭回太素清濁迭興升降啟度遺和旣爽季春

告暮朱明來思青陽受煦日征月盈天道變通太初陶物  
造化爲功四月惟夏南征觀方凱風有集飄颻南窗思樂  
萬物觀異知同有滄萋萋甘雨來播黍稷方華中田多稼  
庭槐振藻園桃阿那薄言觀物在堂知化蓬戶惟情玩物  
一室明發有懷念昔先哲通夢幽人彷彿遺烈清暉在天  
孰與永日乃啟遺籍思予大觀幽居傲物願景怡顏况惟  
解舞衡門重關思媚古人有懷良盤沈曦含輝芳烈如蘭  
厥初生民有物有類自古有稱大寶以位征徒式好俊奔  
攸遂啟予有聞誨爾達貴達貴伊何天爵無榮渾淪大昧  
混其濁清毀方遯象遺頑履貞道實藏器景以昭形芒芒



陋世奚競奚錯收彼紛華委之冲漠漂志垂天矯心馮閣  
道好莊聃儀刑有作安得達人顧予命薄

同前

思樂芳林言采其菊衡薄遵塗中原有菽登彼脩巒在林  
寤宿彷彿佳人清顏如玉予美亾此誰爲適道容與俟之  
玄髮方皓躑躅山阿玩此芳草願澹其穎庶以遺老齏薑  
嘉時飄忽棄予有瞻逝深永歡潛澣願登扶桑仰結飛晷  
伊人匪存遺芳孰與精氣爲物或降或升徂落攸往神奇  
有登死生爲徒存亡曷勝謂予不信遺籍有徵閒居外物  
靜言樂幽繩樞增結甕牖綢繆和神當春清節爲秋天地

則爾戶庭已悠嗟我懷人悠悠其潛念昔先烈有懷所欽  
駭情玩世□允南金瓊輝邈矣誰適爲心明發興言慷慨  
芳林

孫拯

贈陸士龍

五龍戢號雲鳥纂紀清化旣離義風肅始軒冕垂容文教  
乃理奕奕英族盛德豐祀於赫皇矣應天統元蒸文烈公  
光讚懿勳九命重輝恭德彌勤華黼襲藻金石載振淵哉  
陸生丕顯洪胄亦崇懿風邈比弘裕無競惟德豐光伊茂  
文以義好施以仁富山積惟峻道隆名遐潛景在淵龍躍

承華既升爾儀誰不允嘉有濯重淵載清其波濟濟皇朝  
峩峩髦士序爵以賢惟俊萃止翩翩二宮令問不已乃遷  
華閣皇典斯紀思文大謨恢我王猷清風肆穆雅憲允休  
邁彼江川邈此北流微言蘭馥玉藻雲浮遭時之險虎宰  
滔天憑德羨重縈此俊賢休否既亨名以德淵清微伊鑠  
鑽之彌堅明明大象玄鑿照微顯允君子求福不回善挹  
引慶險以德祈澄濁以靜罔久不暉釋彼游寄樂此窈眞  
形以神和思以道新青雲方乘芳餌可捐達觀在一萬物  
自賓寂寂重門誰和子音瞻彼晨風思託茂林

闕

潘岳

關中詩

於皇時晉受命既固三祖在天聖皇紹祚德博化光刑簡  
枉錯微火不戒延我寶庫蠢爾戎狄狡焉思肆虞我國省  
窺我利器岳牧慮殊威懷理二將無專策兵不素肄翹翹  
趙王請徒三萬朝議惟疑未逞斯願桓桓梁征高牙乃建  
旗蓋相望偏師作援虎視耽耽威彼好時素甲日耀玄幕  
雲起誰其繼之夏侯卿士惟系惟處列營碁時夫豈無謀  
戎士承平守有完郭戰無全兵鋒交卒奔孰免孟明飛檄  
秦郊告敗上京周殉師令身膏氏斧人之云亡貞節克舉  
盧播違命投畀朔土爲法受惡誰爲荼苦哀此黎元無罪

無辜肝腦塗地白骨交衢夫行妻寡父出子孤俾我晉民  
化爲狄俘亂離斯瘼日月其稔天子是矜旰食寢寢主憂  
臣勞孰不祇慄愧無獻納尸素以甚皇赫斯怒爰整精銳  
命彼上谷指日邁逝親奉成規稜威遐厲首陷中亭揚聲  
萬計兵固詭道先聲後實聞之有司以萬爲一紂之不善  
我未之必虛鼎滃德謬彰甲吉雍門不啟陳汧危逼觀遂  
虎奮感身輸力重圍克解危城載色豈曰無過功亦不測  
情固萬端于何不有紛紜齊萬亦孔之醜曰納其降曰梟  
其首疇真可掩孰僞可久旣徵爾辭旣蔽爾訟當乃明實  
否則證空好爵旣靡顯戮亦從不見竇林伏尸漢邦周人

之詩實曰采薇北難獫狁西患昆夷以古況今何足曜威  
徒愍斯民我心傷悲斯民如何荼毒于秦師旅旣加饑饉  
是因疫癘淫行荆棘成榛絳陽之粟浮於渭濱明明天子  
視民如傷申命羣司保爾封疆靡暴於眾無陵於強惴惴  
寡弱如熙春陽

潘尼

贈陸機出爲吳王郎中令

東南之美韞惟延州顯允陸生於今尠儔振鱗南海濯翼  
清流婆娑翰林容與墳邱玉以瑜潤隨以光融乃漸上京  
羽儀儲宮玩爾清藻味爾芳風泳之彌廣挹之彌沖崑山

何有有瑤有珉及爾同僚具惟近臣子涉素秋子登青春  
愧無老成厠彼日新祁祁大邦惟桑惟梓穆穆伊人南國  
之紀帝曰爾諧惟王卿士俯僂從命奚恤奚喜我車旣巾  
我馬旣秣星陳夙駕載脂載轄婉變二宮徘徊殿闕醪澄  
莫饗孰慰饑渴昔子忝私貽我蕙蘭今子征東何以贈旃  
寸晷惟寶豈無璵璠彼美陸生可與晤言

答陸士衡

顧茲蓬蔚厠根蘭陂膏澤雖均華不足披逮春不茂未秋  
先萎子濯鱗翼我挫羽儀願言難常載合載離昔游禁闈  
祗畏夕惕今放邱園縱心夷易口詠新詩目玩文跡子志

耕圃爾勤王役慙無琬琰以訓尺璧

王讚

三月三日詩

招搖啟運寒暑代新疊疊不舍如彼行雲猗猗季月穆穆  
和春皇儲降止宴及嘉賓嘉賓伊何具惟姻族如彼葛藟  
衍於樛木郁郁近侍巖巖臺嶽庶寮鱗次以崇天祿如彼  
崑山列此琚玉巍巍天階亦降列宿右載元首左光儲副  
大祚無窮天地爲壽

阮脩

上巳會詩



三春之季歲惟嘉時靈雨旣零風以散之英華扇耀祥鳥  
羣嬉澄澄綠水澹澹其波脩岸逶迤長川相過聊且逍遙  
其樂如何坐此脩筵臨彼素流嘉肴旣設舉爵獻酬彈箏  
弄琴新聲上浮水有七德知者所娛清瀨灑灑澗菱葭芬敷  
沈此芳釣引彼潛魚委餌芳美君子戒諸

閻邱沖

三月三日應詔詩二首

暮春之月春服旣成陽昇土潤冰渙川盈餘萌達壤嘉木  
敷榮后皇宣游旣宴且甯光光華輦詵詵從臣微風扇穢  
朝露翳塵上蔭丹幄下藉文茵臨川挹盥濯故潔新俯鏡

清流仰睇天津藹藹華林巖巖景陽業業峻宇奕奕飛梁  
垂蔭倒景若沈若翔

浩浩白水汎汎龍舟皇在靈沼百辟同游擊櫂清歌鼓柁  
行酬聞樂咸和具醉斯柔在昔帝虞德被遐荒千戚在庭  
苗民來王今我哲后古聖齊芳惠此中國以綏四方元首  
既明股肱惟良樂酒今日君子惟康

左貴嬪

啄木詩

南山有鳥自名啄木饑則啄樹暮則巢宿無干於人惟志  
所欲性清者榮性濁者辱

劉琨

答盧湛

琨頓首損書及詩備辛酸之苦言暢經通之遠旨執玩  
反覆不能釋手慨然以悲歡然以喜昔在少壯未嘗檢  
括遠慕老莊之齊物近嘉阮生之放曠怪厚薄何從  
而生哀樂何由而至自頃輒張困於逆亂國破家亡親  
友彫殘負杖行吟則百憂俱至塊然獨坐則哀憤兩集  
時復相與舉觴對膝破涕爲笑排終身之積慘求數刻  
之暫歡譬由疾疢彌年而欲一丸銷之其可得乎夫才  
生於世世實須才和氏之璧焉得獨曜於郢握夜光之

珠何得專玩於隋掌天下之寶當與天下共之但分析之日不能不悵恨耳然後知聃周之爲虛誕嗣宗之爲妄作也昔馱驥倚輅于吳坂長鳴于良樂知與不知也百里奚愚於虞而知於秦遇與不遇也今君遇之矣勛之而已不復屬意於文二十餘年矣久廢則無次想必欲其一反故稱指送一篇適足以彰來詩之益美耳琨頓首頓首

厄運初邁陽爻在六乾象棟傾坤儀舟覆橫厲糾紛羣妖競逐火燎神州洪流華域彼黍離離彼稷育育哀我皇晉痛心在目天地無心萬物同壑禍淫莫驗福善則虛逆有

全邑義無完都英蕊夏落毒卉冬敷如彼龜玉韞櫝毀諸  
芻狗之談其最得乎咨余軟弱勿克負荷愆豐仍彰榮寵  
屢加威之不建禍延凶播忠隕于國孝愆于家斯罪之積  
如彼山河斯疊之深終莫能磨郁穆舊姻嫵婉新婚不慮  
其敗惟義是敦裏糧攜弱匍匐星奔未輟爾駕已隳我門  
二族偕覆三孽竝根長慙舊孤永負冤魂亭亭孤幹獨生  
無伴綠葉繁縟柔條脩罕朝採爾實夕將爾竿竿翠豐尋  
逸珠盈椀實消我憂憂急用緩逝將去乎庭虛情滿虛滿  
伊何蘭桂移植茂彼春林瘁此秋棘有鳥翻飛不遑休息  
匪桐不棲匪竹不食永戢東羽翰撫西翼我之敬之廢歡

輟職音以賞奏味以殊珍文以明言言以暢神之子之往  
四美不臻澄醪覆觴絲竹生塵素卷莫啟幄無談賓旣孤  
我德又闕我鄰光光段生出幽遷喬資忠履信武烈文昭  
旂弓駢駢與馬翹翹乃奮長縻是轡是鑣何以贈子竭心  
公朝何以敘懷引領長謠

盧謚

贈劉琨

書曰故吏從事中郎盧謚死罪死罪謚稟性短弱當世  
罕任因其自然用安靜退在木闕不材之資處雁乏善  
鳴之分卷異籛子愚殊甯生匠者時眇不免饌賓嘗自

思惟因緣運會得蒙接事自奉清塵於今五稔謨明之  
效不著候人之譏已彰大雅含宏量包山藪加以待接  
彌優款眷逾昵與運籌之謀厠讌私之歡綢繆之旨有  
同骨肉其爲知己古人罔喻昔聶政殉嚴遂之顧荆軻  
慕燕丹之義意氣之間糜軀不悔雖微達節謂之可庶  
然苟曰有情孰能不懷故委身之日夷險以之事與願  
違當忝外役遂去左右收跡府朝蓋本同末異楊朱興  
哀始素終玄墨翟垂涕分乖之際咸可歎慨致感之塗  
或迫于茲亦奚必臨路而後長號覩絲而後歔歔哉是  
以仰惟先情俯覽今遇感存念亡觸物增眷易曰書不

盡言言不盡意然則書非盡言之器言非盡意之具矣  
況言有不得至於盡意書有不得至於盡言耶不勝猥  
瀋謹貢詩一篇抑不足以揄揚弘美亦以攄其所抱而  
已若公肆大惠遂其厚恩錫以咳唾之音慰其違離之  
意則所謂咸池酬於北里夜光報於魚目謚之願也非  
所敢望也謚死罪死罪

濬哲惟皇紹熙有晉振厥弛維光闡遠韻有來斯雍至止  
伊順三臺摘朗四嶽增峻伊陟佐商山甫翼周弘濟艱難  
對揚王休苟非異德曠世同流加其忠貞宣其徽猷伊謚  
陋宗昔邁嘉惠申以婚姻著以累世義等休戚好同興廢



孰云匪諧如樂之契王室喪師私門播遷望公歸之視險  
忽艱茲願不遂中路阻顛仰悲先意俯思身愆大鈞載運  
良辰遂往瞻彼日月迅過俯仰感今惟昔口存心想借曰  
如昨忽爲疇曩疇曩伊何逝者彌疎溫溫恭人慎終如初  
覽彼遺音恤此窮孤譬彼樛木蔓葛以敷妙哉蔓葛得託  
樛木葉不雲布華不星燭承侔卞和質非荆璞眷同尤良  
用乏驥承亦旣篤眷亦旣親飾獎鴛鴦方駕駿珍彌諧  
靡成良謨莫陳無覲狐趙有與五臣五臣奚與契闊百罹  
身經險阻足蹈幽遐義由恩深分隨昵加綢繆委心自同  
匪他昔在暇日妙尋通理尤彼意氣狹是節士情以體生

感以情起趣舍同要窮達斯已由余片言秦人是憚日碑  
效忠飛身有漢桓桓撫軍古賢作冠來牧幽都濟厥塗炭  
塗炭既濟寇挫民阜謬其疲隸授之朝右上懼任大下欣  
施厚實祇高明敢忘所守相彼反哺尙在翔禽孰是人斯  
而忍是心每憑山海庶覲高深遐眺存亡緬成飛沈長徽  
已纓逝將徙舉收跡西踐銜哀東顧曷云塗遼曾不思步  
豈不夙夜謂行多露縣縣女蘿施于松標稟澤淇幹晞陽  
豐條根淺難固莖弱易彫操彼織質承此衝飈織質實微  
衝飈斯值誰謂言精緻在賞意不見得魚亦忘厥餌遺其  
形骸寄之深識先民頤意潛山隱几仰熙丹崖俯澡綠水

無求于私自附眾美慷慨遐蹤有愧高旨爰造異論肝膽  
楚越惟同大觀萬殊一轍死生既齊榮辱奚別處其玄根  
廓焉靡結福爲禍始禍作福階天地盈虛寒暑周迴夫差  
不祀斲在勝齊句踐作伯祚自會稽邈矣達度惟道是杖  
形有未泰神無不暢如川之流如淵之量上弘棟隆下塞  
民望

郭璞

贈溫嶠

人亦有言松竹有林及爾臭味異昔同岑言以忘得交以  
淡成同匪伊和惟我與生爾神余契我懷子情攜手一豁

安知塵冥

葛洪

洗藥池

洞陰泠泠風珮清  
清仙居永劫花木長榮

庾闡

孫登隱居詩

靈崖霞蔚石室鱗  
構青松標空蘭泉吐  
牖龍蒼可游芳津  
可漱玄谷蕭寥鳴  
琴獨奏先生體之  
寂坐幽岸凝冰結  
樸熙陽靡煥潛真  
內全飛榮外散凌  
崖高嘯希風朗彈  
道有冥廢運有昏  
消達隱不崖玄跡  
不標或曰先生晦  
德逍遙

稽子秀達英風朗烈道雋薰芳鮮不玉折兆動初萌妙鑿  
奇絕翹首邱冥仰想玄哲

袁宏

從征行方頭山

峩峩太行凌虛抗勢天嶺交氣窈然無際澄流入神玄谷  
應契四象悟心幽人來憩

孫統

蘭亭集詩

茫茫大造萬化齊軌罔昧玄同競異標旨平勃運謀黃綺  
隱几凡我仰希期山期水

庾友

蘭亭集詩

馳心域表寥寥遠邁理感則一冥然斯會

王徽之

蘭亭集詩

散懷山水蕭然忘羈秀薄粲穎疏松籠崖游羽扇霄鱗躍  
清池歸目寄歡心冥一奇

無名人

白鳩篇

翩翩白鳩載飛載鳴懷我君德來集君庭白雀呈瑞素羽

明鮮翔庭舞翼以應仁乾交鳴鳩或丹或黃樂我君惠  
振羽來翔東壁餘光魚在江湖惠而不費敬我微軀策我  
良駟習我驅馳與君周旋樂道忘饑我心虛靜我志霑濡  
彈琴鼓瑟聊以自娛陵雲登臺浮游太清扳龍附鳳目望  
身輕

獨漉篇

獨漉獨漉水深泥濁泥濁尚可水深般我雝雝雙雁遊戲  
田畔我欲射雁念子孤散翩翩浮萍得風搖輕我心何合  
與之同井空牀低帷誰知無人夜衣錦繡誰別僞真刀鳴  
箭中倚牀無施父冤不報欲活何爲猛虎班班遊戲山間

虎欲齧人不避豪賢

八代詩選第一